

NAHUMU

Iehova ena badu toadia

¹ Maduna metauna Nineve latanai; Nahumu, tau Elkoso, ena mata-hanai bukana.

² Iehova na vāgege bona hadava Diravana,
Iehova na dava e hadavamu mai baduna ida.

Iehova ese ana inai taudia e hadava henidiamu;
ia inaina e badu henidiamu.

³ Iehova ena badu na se vara haraḡamu,
ena goada na herea;
Iehova ese kerere taudia maorodia basine gwau-
rai,
lasi ona lasi vaitani.

lena dala na koe-hirihiri ai bona lai gubana ai,
ori na ia aena ġahuna.

⁴ Ia ese davara e gwau heniamu, e hakororoamu,
sinavai iboudiai e hakororodiamu;
Basan bona Karamele e geaka-geakamu,
Lebanon burena e maraimu.

⁵ Ia vairanai ororo e heude-heudemus,
bona ororo komutadia e vevemu;
ia vairanai tano na e vahumu,
taqobada mai inoholaina taudia iboudiai ida
danu.

⁶ lena badu vairanai daika baine gini?
Ena badu garaḡarana ai daika baine ha-
heauka?

Ena badu na e seia dobimu lahi na heto;
haga nadidia ia ese e hapararadiam.

- 7** Iehova na namo,
 ia na gabu aukana hekwakwanai dinana ai;
 enai e roho maurimu taudia na e dibadiamu.
- 8** A utu-utu badana amo
 ia ese ana inai taudia bame ha-uredia vaitani,
 bona inaina na baine hahavadia
 ela bona dibura lalonai.
- 9** Dahaka o lalo hatalaiamu, Iehova ihadikana?
 Ia ese inaina baine habuadia tari vaitani.
 Ia ese ia inaina basine hadava henidia nega
 harua.
- 10** Au giniginidia heromedia na heheto e aradia
 oremu,
 eiava rei kakoro na heto.
- 11** Iehova ihadikana dalana e lalo hatalaia
 bona kara dika e hahealolaia tauna ta oiemu
 amo se lasi a?
- 12** Iehova ini e gwau tomamu:
 Ena be idia na gogoada bona huhutuma,
 to bae henege daure bona bae puki oho.
 Ena be vada na hahisihisimu,
 to basina hahisihisimu lou.
- 13** Harihari iena madluna oi paḡamu ai na baina
 hakwaidua,
 bona iǵı́mu varodia baina hamotudia.
- 14** Iehova ese oi vada e haǵanilaimu, e tomu:
 Ini amo oi ladamu basine hesiriu;
 emu dirava edia dubu lalona amo
 e koroa bona e hahelaria kaivakukudia baina
 negedia daure;
 oiemu guri baina ǵeia,
 badina be oi na dika rohoroho.
- 15** A itaia, hari namodia e mailaidiamu tauna,

maino e harorolaiamu tauna,
aena na ororo ai.
Iuda e, emu aria ba kara,
emu gwauhamata anidia ba kara,
badina be kara dika tauna ese nega ta ai basine
tuari henimu lou,
ia na vada e henege daure vaitani.

2

Nineve ena darere herevadia

- 1 Ihamakohimu tauna ese vada e tuari henimumu,
mağu ba gimadia, dala ba itaia tao;
emu rami ba hekasilaila,
goadamu idoinai ba heğaeğaelaia.
- 2 (Badina be Iehova ese Iakob siahuna e havaraia loumu,
Israel siahuna heğereğerena;
badina be dadidadi taudia ese vada e dadihaidia,
bona rigidia na vada e hadihakia vaitani.)
- 3 Iena goada taudia edia kesi na kakakaka,
ena tuari taudia ese dabua kakakakadia vada
e hahedokilai.
Kariota e haboudia hegaeğäemu negana ai
idia na e hwuru-hururumu, lahi na heto;
hosí na e hare loamu.
- 4 Kariota na ariara ai e heau lalo-dikamu,
hanua ariaradia ai e heau laomu e heau
maimu;
e kiama-kiamamu kede na heheto,
e kinoa laomu kevaru na heto.
- 5 Tuari biagudia na e boiridiamu,
laodia ai e hetutuhimu;
mağu e heau heniamu,

vaǵoma vada e haheǵaeǵaea.

6 Sinavai ihadai-ahudia vada e kehodia,
pavapava ena rumai kudoudia e hetahamu;
7 pavapava hahinena na ena dabua vada e hahe-
dokidia oho,

vada e laohaia,
ena hesiai kekenidia na e rohe ahumu,
e taimu pune na heheto,
e tai hevalemu.

8 Nineve na ranuna e aru ohomu gohuna na heto;
e boi lolomu, e tomu “A gini, a gini”,
a ta se gini kerehaimu.

9 Silver ba dadia!
Gold ba dadia!

Kohu namodia na asi dokodia,
ǵau herea-daedia na momo herea.

10 Hahevahu! Haheǵagae! Hahebua-tari!
Kudou e hetahamu; tui e tabubu-tabubumu;
koekoe iboudia e hisihisimu;
vaira iboudiai e laboramu.

11 Leona ena guri na edesenai ai?
leona natuna edia kohua na edesenai ai?
leona ese damuna e vareailaia gabuna,
natuna e noholaiamu bena ta ese se hamar-
erediamu gabuna,
be edesenai ai?

12 Leona ese vamu e darea sisisisi, natuna adia,
bona damuna gadona e koria, advana adia;
ena kohua na damuna amo
bona ena guri na vamu amo
e hahonudia.

13 Iehova Sabaota na e tomu: A itaia, lau ese na
tuari henimumu; emu kariota na baina doudia,
kwalahu ai baela; dare ese emu leona natudia

baine ha-oredia; oi damumu na tanobada amo baina negea daure, bona emu gwaukau taudia eredia na basie hekamonai lou.

3

Nineve ihabua-tarina

- 1 Rara hebubu hanuana, madi ihabaina!
Koikoi bona dadidadi ġaudia ai e honu honu daemu;
dadidadi karadia na asi dokodia.
- 2 Hekwadi varona bona ava-keikei reġedia e daemu;
hosi bona kariota e heau lalo-dikamu.
- 3 Hosi gui taudia e tata laomu,
dare e hururu-hururumu, io e kiama-kiamamu;
hutuma bada e masemu,
mase tau-anidia na ē hasenudiamu,
mase tau-anidia na asi dokodia,
ediai e hetutuhimu.
- 4 Ini na ariara hahinena ena ariara karadia momo-hereā daidiai,
mai hairaina bona mai ena mea dikadia,
ena ariara karadia amo basileia idau-idau e dibāġonidiamu,
bona ena mea karadia amo bese ulau-idau e hahekawwanaidiamu.
- 5 Iehova Sabaota na e tomu:
A itaia, lau ese na inai henimumu,
bona vairamu na ramimu amo baina ġovaia ahu.
Bese idau-idau baina haheitalaidia, oi na gagaemu mo,
basileia idau-idau emu hemarai baina haheitalaidia.

- ⁶ Lau ese miro amo baina hodomu, baina dadaraimu,
bona hamue ġauna ai baina halaomu.
- ⁷ Bae itamu taudia iboudiai na bae lagagalaimu,
baeto,
Nineve vada e vahu; daika ese baine tailaia?
Ia tauna ihalona taudia na edesenai baina
tahudia?
- ⁸ Oi ese Tebe o hereaia a?
Ia na Nilo sinavaina isena ai e daia,
ranu ese e ġeġea ahuva,
ia inaina ilao-ahudia ġauna na davara,
bona ena maġu na ranu.
- ⁹ Etiopia na ena goada,
bona Aigupto danu, asi hetoana;
Put bona Libia taudia ese e kahaia.
- ¹⁰ Ġau tamona, vada e abia oho,
mai iġuina ida e laohaia;
ena memero maraġidia na e huaridia patapata,
ariara iboudiai doridia ai;
ena taunimanima namodia, e matauraidia tau-
dia, na
mari amo e abidia,
bona ena lohia badadia na
auri gadeadia amo e ġuidia.
- ¹¹ Oi danu ba keker,
matamu bae madai-madai;
roho-mauri gabuna do ba tahua,
inaimu amo ba roho mauri totona.
- ¹² Emu kohoro iboudiai na suke audia na hehetu,
huahuadie e dobi matama negana ai;
bema haheude-heudedie,
idia na ianidia taudia ududia ai bema moru.

13 A itaia, emu tuari oreadia na hahine na heheto,
oi bogaragimu ai.

Emu tano ikoukoudia na e hekeho vaitani, oi
inaimu vairadiae;
emu kahitao audia na lahi ese vada e aradia
ore.

14 Ranu ba utua, ba hekou ahu negana ranuna,
emu māgu ba ha-aukadia;
raro gabuna baola, raro ba kuia,
raro mauana bavabia.

15 Unuseni ai lahi ese baine hamasemu,
dare ese baine gwadamu mase,
baine animu ore kwadi na heto.

Ba hutuma, kwadi na heto;
ba hutuma, rei kwadidla na heheto.

16 Emu hoihoi taudia o hahohodia,
idia ese guba hisiudia e hereadia;
kwadi ese hanina e toi roromu,
e roho laomu.

17 Emu hanua lohiadia na rei kwadidia na heheto,
emu toretore taudia na kwadi tabatabadia na
heheto;
era ai e helaimu,
keru dinana ai,
a dina e daemu negana ai e roho laomu,
tau ta asi dibana idia na edesenai ai.

18 Asuria pavapavana e,
emu mamoe iregudia taudia na e mahutamu,
emu lohia taudia na e mahuta hedavauhemu,
emu taunimanima na ororo ai e karoho rohoro-
homu,
asi ihaheboudia tauna ta.

19 Emu hisihisi na asi ihanamona dalana,
beromu na dika herea;
oi harimu e kamonaimu taudia iboudiai ese
imadia na e patapata henimumu.
Badina be oiemu hahedika karadia asi dokodia be
daika ese se mamia toho a?

**Buk Baibel long tokples Motu
The Holy Bible in the Motu language of Papua New
Guinea
Buk Baibel long tokples Motu long Nuigini**

Copyright © 1959-1973 Bible Society of Papua New Guinea

Language: Motu

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

PDF generated using Haiola and XeLaTeX on 11 Nov 2022 from source files dated 9 Oct 2020

f540ed61-0b88-5365-8502-08ea44547ef2